

編號 1 號

【上場】徐佳好原作

「防守、防守、防守……大火鑊來吔！」「三分線，咻！擲入去吔，好球，哈哈，蓋壁！」佢蓋享受看籃球比賽，因為做得盡命牯大聲喊，所有個煩惱黏時就毋見核吔。

記得小學四年生，該時節林書豪帶領紐約尼克隊連等得著好成績，全世界都對佢蓋入迷。因為受著這陣皺螺風個影響，五年生佢決定去考籃球體育班。恁好彩，分佢考著吔，無想著嘎係清苦個開始。每朝晨七點半愛到學校訓練兩點鐘，放學過後，還愛再練點半鐘；練核，全班還愛在教室寫核功課正做得歸去。最尾練啊每一個人，走運動坪十過圈都係小可事。因為有同學讓陣¹，還有自家對籃球個熱情，佢毋識喊瘡過。

見係²有比賽，爺哀總會蓋無閒，準備食个、翕相仔搭錄影、做啦啦隊，三不時還愛駛車仔載佢等去比賽，屋下人个支持就係球員最大个力量。爺哀看著佢在球場項有好个表現，都會緊拍手；係球仔分人抓走³吔，都蓋緊張，會在脣口安慰講：「毋怕，

¹ 讓陣：音 ngiong ciin；做伴。

² 見係：音 gian he；每一次、只要是。

³ 抓走：音 sa' zeu'；籃球術語，此指「抄到球」。

再一擺。」一場比賽下來，大家都走啊氣又氣吭⁴、汗流脈落，愛目珠跣好球仔、接好球仔、擲入籃框裡背；係無打好，轉擺⁵个時節就會分教練喝：「你等愛保護球仔，莫戇戇分人抓走啊，愛走位擋人……。」大家緊掙汗緊淋水，凝神恬恬聽，毋敢忖大氣。

打球仔，手腳難免會著傷，有時節無堵好，膝頭會撞著、腳會跲著、腳盤分人蹬著，臃血、烏青、勾筋係平常个。佢毋驚看醫生做復健，就驚忖傷重抑係功課無寫核，教練毋分佢上場，淨做得坐凳板，該時節心肚裡个毋甘願比訓練還過苦哦。

小學个籃球生活，分佢無時間上網搞遊戲，毋單淨功課進步吔，身體變啊蓋砸礮，乜學習著仰仔同人合作，正經體會著這句話：「贏球莫沙鼻，輸球莫失志。」無論輸贏，都分佢成長蓋多。

⁴ 氣又氣吭：音 hi ca' hi hong'；上氣不接下氣。

⁵ 轉擺：音 zon' bai'；休息。

編號 2 號

【外阿婆个菜園教室】李秀鳳原作

放暑假吔，阿爸、阿姆送偌同老妹歸去滿舅屋下，同外阿婆共下歇兩隻月。毋使去安親班吹冷氣關歸日，係偌兩姊妹最暢樂个事情。其實，偌等在鄉下乜愛去上課，無共樣个係：毋使讀書，每日朝晨跔等外阿婆先生去菜園教室，認識各種青菜。

外阿婆在菜園搭一個菜瓜棚，棚頂一蕊一蕊个黃花開啊幫滿，偌同老妹算看啊有幾多蕊？做得打幾多條菜瓜？外阿婆笑弛弛仔講：「毋使算啦！有兜个係公花，毋會打子。」原來菜瓜花同油桐花共樣，有公个乜有嫲个。

偌發現外阿婆个菜園，分黃色个花號¹啊一哪都係，除了菜瓜仔以外，像瓠仔、苦瓜仔、笏瓜、番瓜、長豆仔開个花都係黃色个。「這仔有開吊菜色个花。」老妹看等一排毋知麼个菜，該梗係深吊菜色个，就喊啊大嫲聲。外阿婆講這安到「吊菜仔」，係吊菜仔開黃花，該就反種吔，故所吊菜色个吊菜仔，定著係開吊菜色个花。

日頭恁烈，偌同老妹坐在菜瓜棚下奈涼，看外阿婆改菜廂。

老妹看生啊像手指公恁長个菜瓜仔掛等一蕊黃花，還得人惜，就用拈食指去揆，細菜瓜仔連等花緊顫，實在還生趣，偌也跔等搞。外阿婆看偌兩姊妹恬恬搞啊恁興，就行兼來看，「阿姆唷！你兩儕仰會手恁賤，毋知還子子个菜瓜仔蓋孤老麼？花同細菜瓜仔分人摸過就會消核²。」分外阿婆喝啊去，兩姊妹嚇著一下毋敢出聲。麼个係孤老呀？兩個細孺仔恁毋解。外阿婆看出偌兩儕心肚裡个疑狐講：「幾日添你等就知吔。」

無幾多日，分偌同老妹揆過个細菜瓜仔緊來緊烏，接等細菜瓜仔並花都燥核殿淨淨，原來這就係孤老。外阿婆講：「細人仔愛有量兜仔，毋好動啊著就噉噉滾像孤老个人樣仔得人惱，知無？」偌同老妹緊領頭緊應：「知吔！」

偌同老妹最好跔等外阿婆去菜園教室，毋單淨做得認識各種青菜，還做得了解佢等成長个特性，比上自然課還過有意思。

¹ 號：音 ho；霸佔。

² 消核：音 xiau' hed'；死亡、消失。

編號 3 號

【 佢个飯包 】鄒瑞梅原作

對出世到這下，阿婆都一等惜佢，驚佢熱、驚佢寒、驚佢三餐無正常。

同學个飯包大部分係阿姆準備个， 佢个飯包係阿婆親手做个。每日當晝食飯个時節，就像指望開獎樣仔，因為佢个飯包特別香，裡背有魚有肉有青菜，還有阿婆惜花連盆、惜子連孫、惜佢惜入心个親情。坐在佢脣口个阿明牯、阿秀同阿華目盯盯仔緊看佢个飯包，口涎都會流出來也！佢別事講飯包打毋開，佢等比佢還過緊張，大家相^ㄟ愛同佢搵手，實在還生趣！等佢打開飯包，歸間教室都鼻得著阿婆个好手藝，阿明牯揣講一定係燜肉，正式就分佢揣著也。佢等感情蓋好，還會交菜食，佢食佢个燜肉，佢食佢个煙腸，兩儕食啊飽飽仔。

阿婆个好手藝，仰仔講都毋會漏氣¹，佢煎个黃魚仔兩片赤赤毋會臭火爌。佢最好食阿婆个客家炒肉。堵著敬神拜祖个時節，阿婆會準備雞鴨、魷魚仔、豬肉料、豆腐乾湊牲祭拜。該暗晡个桌頂，一定會有鹹香鹹香个客家炒肉，阿婆會特別吩咐阿姆愛煮

加兩碗米哦！

阿婆同阿姆在灶下無閒泊杈，阿姆同魷魚仔、豬肉料、豆腐乾，還有自家菜園摘个蔥仔、蒜仔、芹菜、辣椒仔，通棚切好勢，就準備換阿婆炒菜也！阿婆兩下手板就炒出客家好味緒。桌頂有雞盤、快菜炒豬旺仔、薤菜、鹹菜湯，還有佢最好食个客家炒肉。阿公、阿爸、阿姆緊食緊說阿婆个手路菜，好食啊舌嫵就會吞下去也。客家炒肉實在蓋扯飯哦！佢同阿哥連食兩碗飯，食啊飯煲仔都見底也，桌頂个菜分佢等掃淨淨，佢同阿哥食啊肚圓，阿婆看著嘎好噓。

食飯个時節，阿婆同佢等个飯包裝啊幫滿，阿婆自家个碗項就淨菜湯擺飯。

食等阿婆親手做个飯包，就想著阿婆在灶下汗流脈落个身影。佢愛煞猛讀書，做一個有用个人，等佢大也，一定愛報答阿婆个恩情。阿婆畜佢大，佢定著會有孝阿婆到老。

¹ 漏氣：音 lau kui / lau kuiˊ；閩南語借詞。比喻行為表現令人喪氣。